


廣文選

第十壹冊  
疏類


				漢書門
二	二	二	二	
五	四	四	六	
冊	架	函	號	類



庫	文	閣	內
三			漢
六			書
函			
一			
八			
架			

內閣文庫	
番號	漢 11086
冊數	25( 12 )
函號	361 41





廣廣文選卷之十一

四明

周應洽

纂

嶺南門人彭必鳴校

疏



論時政疏

臣聞天地以弘濟為仁君道以惠下為德是以禹湯有身勸之績唐虞有在堯之誥用能惠被蒼生勳流後葉宣帝開拓洪圖始基成命爰及文武曆數在躬而猶虛心側席早已崇物然後知積累之功重勤王

之業難先君之德弘貽歿之賜厚惠皇不懷委政內  
任遂使神器幽淪三光隱翳園陵懷九泉之感宮廟  
集胡馬之跡所謂肉食失之於朝黎庶暴骸於外也  
賴元皇帝神武應期祚隆淮海振乾綱於已墜紐絕  
維而更張陛下承宣帝開始之宏基受元帝克終之  
成烈保大定功戢兵靜亂故使負鱗橫海之鯨僭位  
滔天之寇望雲棋而霄渾覩太陽而霧散巍巍蕩蕩  
人無名焉而頃年已來天文違錯妖怪屢生會稽先  
帝本封而城動經年昔周之文武有魚鳥之瑞君臣

猶懷震悚况今災變衆集曾莫之疑公旦有勿休之誠  
賈誼有積薪之喻臣鑒先徵竊惟今事是以敢肆狂  
瞽直言無諱往者先帝以玄風御世責成群后坐運  
天網隨化委順故忘日計之功收歲成之用今禮樂  
征伐自天子出相王賢雋協和百揆六合承風天下  
響振而鈞臺之詠弗聞景毫之命未布將群臣之不  
稱陛下用之不盡乎凡聖王之化莫不敦崇忠信  
存正棄邪傷化毀俗者雖親雖貴必踈而遠之清  
公真脩者雖微雖賤必親而近之今則不然此風

既替利競滋甚朋黨比周毀譽交興鑽求苟進人  
希分外見賢而居其上受祿每過其量希旨承意  
者以爲奉公共相讚悅者以爲忠節舉世見之誰  
敢正言陛下不明必行之法以絕穿鑿之源恐脫  
因疲倦以誤視聽且符堅滅亡於今五年舊京殘  
毀諸陵無衛百姓塗炭未蒙拯接伏願遠觀漢魏  
衰滅之由近覽西朝傾覆之際超然易慮爲於未  
有則靈根永固社稷無虞臣豈誣一朝之人皆無  
忠節但任非其才求之不至耳今政煩役殷所在

凋弊倉廩空虚國用傾竭下民侵削流亡相屬略  
計戶口但咸安已來十分去三百姓懷浮游之歎  
下泉興周京之思昔漢宣有云與我共治天下者  
其惟良二千石乎是以臨下有方者就加璽贈法  
苛政亂者恤刑不赦事簡於上人悅於下今則不  
然告時乞職者以家弊爲辭振窮恤滯者以公爵  
爲施古者爲百姓立君使之司牧今者以百姓恤  
君使之蠶食至乃貪汚者謂之清勤慎法者謂之  
怯劣何反古道一至於此陛下雖躬自節儉哀矜

於上而群寮肆欲蹤心於下六司垂翼三事拱默  
故有識者覩人事以歎息觀天青而大懼昔宋景  
退熒惑之災殷宗消鼎雉之異伏願陛下仰觀大  
禹過門之志俯察商辛沉湎之失遠思國風恭公  
之刺深惟定姜小臣之喻整迴聖恩大詢群后延  
納衆賢訪以得失令百寮率職人言洞監察其所  
由觀其所以審識群才助鼎和味克念作聖以啓  
天休則四海宅心天下幸甚

諫興工役疏

棧潛

明帝時衆役竝興戚屬疏斥潛上疏曰天生蒸民  
而樹之君所以覆燾群生熙育兆庶故方制四海  
匪爲天子裂土分疆匪爲諸侯也始自三皇爰暨  
唐虞咸以博濟加於天下醇德以洽黎元賴之三  
王暨微降逮於漢治日益少喪亂弘多自時厥後  
亦罔克乂大祖濬哲神武芟除暴亂克復王綱以  
開帝業文帝受天明命廓恢皇基踐阼七載每事  
未遑陛下聖德纂承洪緒宜崇晏晏與民休息而  
方隅匪寧征夫遠戍有事海外縣旌萬里六軍騷

動水陸轉運百姓舍業日費千金大興殿舍功作  
萬計徂來之松刊山窮谷怪石珉珉浮於河淮都  
圻之內盡爲甸服當供稟秬粟之調而爲苑囿  
擇禽之府盛林莽之穢豐鹿兔之藪傷害農功地  
繁茨棘災疫流行民物大貴上減和氣嘉禾不植  
臣聞文王作豐經始勿亟百姓子來不日而成靈  
沼靈囿與民共之今宮觀崇侈彫鏤極妙忘有虞  
之惣期思殷辛之瓊室禁地千里舉足投網麗擬  
阿房役百乾谿臣恐民力彫盡下不堪命也

政事疏

王朗

兵起以來三十餘年四海盪覆萬國殄瘁賴先王  
爰除寇賊扶育孤弱遂令華夏復有綱紀鳩集兆  
民于茲魏土使封鄙之內雞鳴狗吠達於四境蒸  
庶欣欣喜遇升平今遠方之寇未賓兵戎之役未  
息誠令復除足以懷遠人良宰足以宣德澤阡陌  
咸脩四民殷熾必復過於曩時而富於平日矣易  
稱勅法書著祥刑一人有慶兆民賴之慎法獄之  
謂也昔曹相國以獄市爲寄路溫舒疾治獄之吏

廣文選 卷之十一 五  
夫治獄者得其情則無寃死之囚丁壯者得盡地力則無饑饉之民窮老者得仰倉食廩則無餓餓之殍嫁娶以時則男女無怨曠之恨胎養必全則孕者無自傷之哀新生必復則孩者無不育之累壯而後役則幼者無離家之思二毛不戒則老者無頓伏之患醫藥以療其疾寬繇以樂其業威罰以抑其強恩仁以濟其弱振貸以贍其乏十年之後既筭者必盈巷二十年之後勝兵者必滿野矣

諫左右壅蔽疏

蔣濟

時中書監令號為專任濟上疏曰大臣太重者國危左右太親者身蔽古之至戒也往者大臣兼事外內扇動陛下卓然日覽萬機莫不祇肅夫大臣非不忠也然威權在下則衆心慢上勢之常也陛下既已察之於大臣願無忘於左右左右忠正遠慮未必賢於大臣至於便辟取合或能工之今外所言輒云中書雖使恭慎不敢外交但有此名猶惑世俗况實握事要日在目前儻因疲倦之間有所割制衆臣見其能推移於事即亦因時而向之

廣文選 卷十一 六  
一有此端因當內設自完以此衆語私招所交爲  
之內援若此臧否毀譽必有所興功負賞罰必有  
所易直道而上者或壅曲附左右者反達微而入  
緣形而出意所狎信不復猜覺此宜聖智所當早  
聞外以經意則形際自見或恐朝臣畏言不合而  
受左右之怨莫適以聞臣竊亮陛下潛神默思公  
聽竝觀若事有未盡於理而物有未周於用將改  
曲易調遠與黃唐角切近昭武文之迹豈近習而  
而已哉然人君猶不可悉天下事以適已明當有

所付三官任一臣非周公旦之志又非管夷吾之  
公則有弄機敗官之弊當今柱石之士雖少至於  
行稱一州智效一官忠信竭命各奉其職可竝驅  
策不使聖明之朝有專吏之名也

崇儉疏

江道

臣聞王者處萬乘之極享富有之大必顯明制度  
以表崇高盛其文物以殊貴賤建靈臺浚辟雍立  
宮館設苑囿所以弘於皇之尊彰臨下之義前聖  
創其禮後代遵其矩當代之君咸營斯事周宣興



百堵之作鴻鴈歌安宅之歡魯僖脩泮水之宮採  
芹有思樂之頌蓋上之有爲非予欲是盈下之奉  
上不以劬勞爲勤此自古之令典軌儀之大式也  
夫理無常然三正相詭司牧之體與世而移致飾  
則素故賁返於剝有大必盈則受之以謙損上益  
下順兆庶之悅享以二簋用至約之義是以唐虞  
流化於茅茨夏禹垂美於卑室過儉之陋非中庸  
之制然三聖行之以致至道漢高祖當營建之始  
充庫之壯孝文處旣富之世愛士家之產亦以播

惠當時著稱來葉今者二虜未殄神州荒蕪舉江  
左之衆經畧艱難漕揚越之粟北餽河洛兵不獲  
戢運戍悠遠倉庫內罄百姓力竭加春夏以來水  
旱爲害遠近之收普減常年財傷人困大役未已  
軍國之用無所取給方之往代豐弊相懸損之又  
損實在今日伏惟陛下聖質天縱疑曠清虛闡日  
新之盛茂欽明之量無欲體於自然冲素刑乎萬  
國韶旣盡美則色盡善宜養以玄虛守以無爲登  
覽不以臺觀游豫不以苑沼偃息畢於仁義馳騁

極於六藝觀巍巍之隆鑒二代之交仰味羲農俯  
尋周孔其爲逍遙足以導道德之輔親搢紳之秀  
疇咨以時顧問不倦獻替諷諫日月而聞則庶績  
惟凝六合咸熙中興之盛邁於殷宗休嘉之慶流  
乎無窮

勸興學疏

戴邈

臣聞天道之所大莫大於陰陽帝王之至務莫重  
於禮學是以古之建國有明堂辟雍之制鄉有庠  
序黌校之儀皆所以抽導幽滯啓廣才思蓋以六

四有困蒙之吝君子大養正之功也昔仲尼列國  
之大夫耳興禮脩學於洙泗之間四方髦俊斐然  
向風身達者七十餘人自茲以來千載絕塵豈天  
下小於魯衛賢哲乏於曩時勵與不勵故也自傾  
國遭無妄之積社稷有綴旒之危寇羯飲馬於長  
江兇狡鷓張於萬里遂使神州蕭條鞠爲茂草四  
海之內人跡不交人主有旰食之憂黎元懷荼毒  
之苦戎首交拜於中原何遽籩豆之事哉然三年  
不爲禮禮必壞三年不爲樂樂必崩况曠載累紀

如此之久邪今未進後生目不覩揖讓升降之儀  
耳不聞鍾鼓管絃之音文章散滅圖讖無遺此蓋  
聖達之所深悼有識之所嗟嘆也夫平世尚文遭  
亂尚武文武適用長久之道譬之天地昏明之迭  
自古以來未有不由之者也今或以天下未一非  
興禮樂之時此言似之而不其然夫儒道深奧不  
可倉卒而成古之俊乂必三年而通一經比天下  
平泰然後脩之則功成事定誰與制禮作樂著哉  
又貴遊之子未必有斬將搃旗之才亦未有從軍

征戍之役不及盛年講肄道義使明珠加磨瑩之  
功荆璞發採琢之榮不亦良可惜乎臣愚以世喪  
道乂人情玩於所習純風日去華競日彰猶火之  
消膏而莫知覺也今天地告始萬物權輿聖朝以  
神武之德值革命之運蕩近世之流弊繼千載之  
絕軌篤道崇儒創立大業明主唱之於上宰輔督  
之於下夫上之所好下必有過之者焉是故雙劍  
之節崇而飛白之俗成挾琴之容飾而赴曲之和  
作君子之德風小人之德草實在感之而已

政治疏

應詹

夫欲用天下之智力者莫若使天下信之也商鞅移木豈禮也哉有由而然自經荒弊綱紀頽陵清直之風既澆糟粕之俗猶在誠宜濯以滄浪之流濼以吞舟之網則幽顯明別於變時雍矣弘濟茲務在乎官人今南北雜錯屬託者無保負之累而輕舉所知此博采所以未精職理所以多闕今凡有所用宜隨其能而不與舉主同乎褒貶則人有慎舉之恭官無廢職之吝昔異缺有功胥臣蒙先

茅之賞子玉敗軍子文受薦賈之責古既有之今亦宜然漢朝使刺史行部乘傳奏事猶恐不足以辨彰幽明弘宣政道故復有繡衣直指今之艱弊過於往昔宜分遣黃散若中書郎等循行天下觀採得失舉善彈違斷絕苟且則人不敢為非矣漢宣帝時二千石有居職脩明者則入為公卿其不稱職免官者皆還為平人懲勸必行故歷世長久中間以來遷不足競免不足懼或有進而失意退而得分蒞官雖美當以素論降替在職實劣直以

廣慶文選 卷之十  
十一  
舊望登叙校游談為多少不以實事為先後以此責成臣未見其兆也今宜峻在降舊制可二千石免官三年乃得叙用長史六年戶口折半道理倍之此法必明使天下知官難得而易失必人慎其職朝無惰官矣

崇退讓疏

庾峻

臣聞黎庶之性人衆而賢寡設官分職則官分而賢衆為賢衆而官多則妨化以無官而棄賢則廢道是故聖主之御世也因人之性或出或處故有

朝廷之士又有山林之士朝廷之士佐主成化猶人之有股肱心膂共為一體也山林之士被褐懷玉太上棲於丘園高節出於衆庶其次輕爵服遠耻辱以全名最下就列位惟無功而能知止彼其清劭足以抑貪汙退讓足以息鄙事故在朝之士聞其風而悅之將受爵者皆耻躬之不逮斯山林之士避寵之臣所以為美也先王嘉之節雖離世而德合于主行雖詭朝而功同于政故大者有玉帛之命其次有几杖之禮以厚德載物出處有地

既廊廟多賢才而野人亦不失為君子此先王之  
弘也秦塞斯路利出一官唯有處士之名而無爵  
列於朝者商君謂之六蝎韓非謂之五蠹時不知  
德惟爵是聞故閭閻以公乘侮其鄉人郎中以上  
爵傲其父兄漢祖反之大暢斯否任蕭曹以天下  
重四皓於南山以張良之勲而班在叔孫之後蓋  
公之賤而曹相諮之以政帝王貴德於上俗亦反  
本於下故田叔等十人漢廷臣無能出其右者而  
未嘗干祿於時以釋之之貴結王生之襪於朝而

其名愈重自非主臣尚德兼愛孰能通天下之志  
如此其大者乎夫不革百王之弊徒務救世之政  
文士競智而務入武夫恃力而爭先官高矣而意  
未滿功報矣其求不已又國無隨才任官之制俗  
無難進易退之耻位一高雖無功而不見下已負  
敗而後見用故因前而升則處士之路塞矣又仕  
者黜陟無章是以普天之下先競而後讓舉世之  
士有進而無退大人溺於動俗執政撓於群言衡  
石為之失平清濁安可復分昔者先王患向之所

廣雅卷之十一  
以取天下者令之爲弊是故功成必改其物業定  
必易其教雖以爵祿使下臣無貪陵之行主無窮  
武之悔也臣愚以爲古者大夫七十懸車今自非  
元功國老三司上才可聽七十致仕則士無懷祿  
之嫌矣其父母八十可聽終養則孝莫大於事親  
矣吏歷試無績依古終身不仕則官無秕政矣能  
小而不能大可降還蒞小則使人以器矣人主進  
人以禮退人以禮人臣亦量能受爵矣其有孝如  
王陽臨九折而去官潔如貢禹冠一免而不著及

知止如王孫知足如踈廣雖云列位而居東野與  
人父言依於慈與人子言依於孝此其出言合於  
國檢危行彰於本朝去勢如脫屣路人爲之隕涕  
辭寵如金石庸夫爲之興行是故先王許之而聖  
人貴之夫人之性陵上猶水之趣下也益而不已  
必決升而不已必困始於匹夫行義不敦終於皇  
輿爲之敗績固不可不慎也下人奔心進趣上宜  
以退讓去其甚者退讓不可以刑罰使莫若聽朝  
士時時從志山林往往間出無使入者不能復出

往者不能復反然後出處交泰提衡而立時靡有  
爭天下可得而化矣

論庾翼疏

范汪

臣伏思安西將軍翼今至襄陽倉卒攻討凡百草  
創安陸之調不復為襄陽之用而玄冬之月沔漢  
乾涸皆當魚貫而行排推而進設一處有急勢不  
相救臣所至慮一也又既至之後烜宣當出宣往  
實翦豺狼之林招攜貳之衆待之以至寬御之以  
無法田疇懇闢生產始立而當移之必有嗷然悔

吝難測臣所至慮二也襄陽頓益數萬口奉師之  
費皆當出於江南運漕之難船人之力不可不熟  
計臣之所至慮三也且申伯之尊而與邊將竝驅  
又東軍不進殊為孤懸兵書云知彼知此百戰不  
殆知彼不知此一勝一負賊誠衰弊然得臣猶在  
我雖方隆今實未暇而連兵不解患難將起臣所  
至慮四也翼豈不知兵家所患常在於此顧以門  
戶事任憂責莫大晏然終年非心情所安是以抗  
表輒行畢命異所以翼宏規經畧文武用命忽遇



豐會大事便濟然國家之慮常以萬全非至安至  
審王者不舉臣謂宣嚴詔召翼還鎮養銳以爲後  
圖若少合聖聽乞密出臣表與車騎臣冰等議共  
集議

陳時政疏

范甯

古者分土割境以益百姓之心聖王作制籍無黃  
白之別昔中原喪亂流寓江左庶有旋反之期故  
許其挾註本郡自爾漸久人安其業丘壟墳柏皆  
已成行雖無本邦之名而有安土之實今宜正其

封疆以土斷人戶明考課之科脩閭伍之法難者  
必曰人各有桑梓俗自有南北一朝屬戶長爲人  
隸君子則有土風之慨小人則懷下役之慮斯誠  
并兼者之所執而非通理者之篤論也古者失地  
之君猶臣所寓之主列國之臣亦有違適之禮隨  
會仕秦致稱春秋樂毅宦燕見襄良史且今普天  
之人原其氏出皆隨世遷移何至於今而獨不可  
允荒郡之人星居東西遠者千餘近者數百而舉  
召役調皆相資須期會差違輒致嚴坐人不堪命

叛爲盜賊是以山湖日積刑獄愈滋今荒小郡縣皆宜并合不滿五千戶不得爲郡不滿千戶不得爲縣守宰之任宜得清平之人頃者選舉惟以郵貧爲先雖制有六年而富足便退又郡守長吏牽置無常或兼臺職或帶府君夫府以統州州以監郡郡以涖縣如令互相領帖則是下官反爲上司賦調役使無復節限且牽曳百姓營起解舍東西流遷人人易處文書簿籍少有存者先之室宇皆爲私家後來新官復應脩立其爲弊也胡可勝言又方鎮去官皆割精兵器

仗以爲送故米布之屬不可稱計監司相容初無彈糾其中或有清白亦復不見甄異送兵多者至有千餘家少有數十戶旣力入私門復資官廩布兵役旣竭枉服良人牽引無端以相充補若是功勲之臣則已享烈士之祚豈應封外復置吏兵乎謂送故之格宜爲節制以三年爲斷夫人性無涯奢儉由執今并兼之士亦多不贍非力不足以厚身非祿不足以富家是得之有由而用之無節痛酒永日馳騫卒年一宴之饌費過十金麗服之美

不可貲美盛狗馬之飾營鄭衛之音南畝廢而不  
墾講誦闕而無聞凡庸競馳奢誕成俗謂宜驗其  
鄉黨考其業尚試其能否然後升進如此匪惟家  
給人足賢人豈不繼踵而至哉官制謫兵不相襲  
代頃者小事便以補役一愆之違辱及累世親戚  
傍文罹其禍毒戶口減耗亦由於此皆宜料遣以  
全國信禮十九為長殤以其未成人也十五為中  
殤以為尚童幼也今以十六為全丁則備成人之  
役矣以十三為半丁所任非復童幼之事矣豈可

傷天理違經典困苦萬姓乃至此乎今宜脩禮文  
以二十為全丁十六至十九為半丁則人無夭折  
生長滋繁矣

請置副將疏

何曾

臣聞先王制法必全於慎故建官受任則置副佐  
陳師命將則立監貳宣命遣使則設介副臨敵交  
刃又參御右蓋以盡思謀之功防安危之變也是  
以在險當難則權足相濟隕缺不豫則才足相代  
其為國防至深至遠及至漢氏亦循舊章韓信伐

唐書文選 卷之十一  
趙張耳爲貳馬援討越劉隆副軍前世之迹著在  
篇志今大尉奉辭誅罪精甲銳鋒步騎數萬道路  
迥阻四千里雖假天威有征無戰寇或潛遁引日  
月命無常期人非金石遠慮詳備誠宜有副今北  
軍諸將及太尉所督皆爲寮屬名位不殊素無定  
分統御之尊卒有變急不相鎮攝存不忘亡聖達  
所裁臣愚以爲宜選大臣名將威重宿著者成其  
禮秩遣詣北軍進同謀略退爲副佐雖有萬一不  
虞之變軍主有儲則無患矣

諫興工疏

王儉

上壞宋明帝紫極殿聚材柱起宣陽門儉與褚淵  
及叔僧虔連名上疏諫曰臣聞德者身之基儉者  
德之輿春臺將立晉卿秉議北宮肇構漢臣盡規  
彼二君者或列國常侯或守文中主尚使諫諍在  
義即悅况陛下聖哲應期臣等職司隆重敢藉前  
誥竊乃有心陛下登庸宰物節省之教旣昭龍袞  
璇極簡約之訓彌遠乾華外構采椽不斷紫極故  
材爲宣陽門臣等未譬也夫移心疾於股肱非良

慶曆文選 卷之十一 十一  
醫之美畏影迹而馳驚豈靜處之方且又三農在  
日千畝咸事輟望歲之勤興土木之役非所以宣  
昭大猷光示遐邇若以門居宮南重陽所屬年月  
稍久漸就淪胥自可隨宜脩理而合度改作之煩  
於是乎息所啓謬合請付外施行上手詔酌納

詣公車門上疏

崔偃

臣竊惟太祖高宗之孝子忠臣而昏主之賊臣亂  
子者江夏王與陛下先臣與鎮軍是也臣聞堯舜  
之心常以天下爲憂而不以位爲樂被子然之身

壟畝之人猶尚若此况祖業之重蒙國之切江夏  
既行之於前陛下又蹈之於後雖成敗異術而所  
由同方也陛下初登至尊與天合符天下纖介之  
屈尚望陛下申之絲髮之寬尚望陛下理之况先  
帝之子陛下之兄所行之道即陛下所由哉如此  
尚弗恤其餘何幾哉陛下德侔造化仁育群生雖  
在昆蟲草木有不得其所者覽而傷焉而况乎友  
愛天至孔懷之深夫豈不懷將以事割此實左右  
不明未之或詳惟陛下公聽竝觀以詢之葛藟群

廣廣文選 卷之十一  
臣有以臣言爲不可乞使臣廷辯之則天人之意  
塞四海之疑釋必若不然僥小民之無識耳使其  
曉然知此相聚而逃陛下以責江夏之寃朝廷將  
何以應之哉若天聽沛然回光發側愴之詔而使  
東牟朱虛東褒儀父之節則荷戈之士誰不盡死  
愚戇之言萬一上合事乞留中

又上疏

崔偃

近冒陳江夏之寃定承聖詔已有褒贈此臣狂踈  
之罪也然臣所以諮問者不得其實罪在萬沒無

所復云但愚心所恨非敢以父子之親骨肉之間  
而僥幸曲陛下之法傷至公之義誠不曉聖朝所  
以然之意何則狂主雖狂而實是天子江夏雖賢  
實是人臣先臣奉人臣逆人君以爲不可申明詔  
得矣然未審陛下亦是人臣不而鎮軍亦復奉人  
臣逆人君今之嚴兵勁卒方指於象魏者其故何  
哉臣所不死苟存視息非有他故所以待皇運之  
開泰申寃魂之枉屈今皇運旣已開泰矣而死於  
社稷盡忠反以爲賊臣何用此生陛下世矣臣聞

王臣之節竭智盡公以奉其上居股肱之仕者申  
理寬滯薦達群賢凡此衆臣夙興夜寐心不嘗須  
臾之間而不在公故萬物無不得其理而頌聲作  
焉臣謹案鎮軍將軍臣顓胃宗室之親股肱之重  
身有伊霍之功荷陛下稷旦之任中領軍臣諱受  
帷幄之寄副宰相之尊皆所以棟梁朝廷社稷之  
臣天下所當遑遑匪懈盡忠竭誠欲使萬物得理  
而頌聲大興者豈復宜踰此哉 同知先臣股肱  
江夏匡濟王室天命未遂王樂與亡而不爲陛下

瞥然一言知而不言是不忠之臣不知而言乃不  
智之臣此而不知將何所知如以江夏心異先臣  
受制臣力則江夏同致死斃聽可昏政淫刑見殘  
無道然江夏之異以何爲明孔呂二人誰以爲戮  
手御麾幡言輒任公同心共志心若膠漆而以爲  
異臣竊惑焉如以先臣遣使江夏斬之則征東之  
驛何爲見戮陛下斬征東之使寔詐山陽江夏違  
先臣之請實謀孔矜天命有歸故事業不遂耳夫  
唯聖人乃知天命守忠之臣唯知盡死安顧成敗

廣曆文選 卷之十一 三十一  
詔稱江夏遭時屯故跡屈行令內恕探情無玷純  
節今缺之旨又何以處鎮軍哉臣所言畢矣乞就  
湯鑊然臣雖萬沒猶願陛下必申先臣何則惻愴  
而申之則天下伏不惻愴而申之天下之人北面  
而事陛下者徒以力屈耳先臣之忠有識所知南  
史之筆千載可期亦何待陛下屈伸而為褒貶然  
小臣惓惓之愚為陛下計耳臣之所言非孝於父  
實忠於君唯陛下熟察少留心焉臣頓觸宸嚴而  
不彰露所以每上封事者非自為戇地猶以春秋

之義有隱諱之意也臣雖淺薄然今日之事斬足  
斷頭殘身滅形何所不能為陛下耳臣聞生人之  
死肉人之骨有識之士未為多感公聽竝觀伸人  
之冤秉德任公理人之屈則普天之人爭為之死  
何則理之所不可以已也陛下若引臣冤免臣兄  
之罪收往失發惻愴之詔懷可報之意則桀之犬  
實可吠堯跖之客實可刺由又何况由之犬堯之  
客臣非去生實為陛下重此名於天下已成之基  
可惜之寶莫復是加寢昌不可不循寢微寢滅不



可不慎惟陛下熟察詳擇其衷若陛下猶以爲疑  
鎮軍未之允決乞下征東共詳可否無以向隅之  
悲而傷陛下滿堂之樂何則陛下昏主之弟江夏  
亦昏主之弟鎮軍受遺託之恩先臣亦荷顧命之  
重情節無異所爲皆同殊者唯以成敗仰資聖朝  
耳臣不勝愚忠請使群臣廷辯者臣乞專令一人  
精賜本語僥幸萬一天聽昭然則軻沈七族離燔  
妻子人以爲難臣豈不易

和戎疏

孔稚圭

匈奴爲患自古而然雖三代智勇兩漢權竒策略  
之要二途而已一則鐵馬風馳奮威沙漠二則輕  
車出使通驛虜庭摧而言之優劣可覩今之議者  
咸以丈夫之氣耻居物下况我天威寧可先屈吳  
楚勁猛帶甲百萬截彼鯨鯢何往不碎請和示弱  
非國計也臣以爲戎狄獸性本非人倫嗚呼狼踞  
不足喜怒蜂目蠆尾何關美惡唯宜勝之以深權  
制之以遠筴弘之以大度處以之蟲賊豈足肆天  
下之忿捐蒼生之命發雷電之怒爭蟲鳥之氣百

廣曆文選 卷之五 三十四  
戰百勝不足稱雄橫尸千里無益上國而蟻聚蠶  
櫛窮誅不盡馬足毛群難與競逐漢高橫威嶺表  
窘迫長圍孝文國富刑清事屈陵辱宣帝撫納安  
靜朝馬不驚光武卑辭厚禮寒山無靄是兩京四  
塞英濟中區輸寶貨以結和遣宗女以通好長駕  
遠馭子孫是賴豈不欲戰惜民命也唯漢武藉五  
世之資六合之富驕心奢志大事匈奴逆連兵積  
歲轉戰千里長驅瀚海飲馬籠城雖斬獲名王屠  
走凶羯而漢之棄甲十亡其九故衛霍出關千隊

不反貳師入漢百旅頓降李廣敗於前鋒李陵沒  
於後陣其餘奔北不可勝數遂使國儲空懸戶口  
減半好戰之功其利安在戰不及和相去何若自  
西朝不綱東晉遷鼎群胡沸亂羌狄交橫荆棘攢  
於陵廟豺虎咆於宮闈山淵反覆黔首塗地逼迫  
崩騰開闢未有是時得失略不稍陳近至元嘉多  
年無事末路不量復挑疆敵遂迺連城覆徙虜馬  
飲江青徐州之際草木爲人耳建元之初胡塵犯  
塞永明之始復結通和十餘年間邊侯且息陛下

張天造曆駕日登皇聲雷寓宙勢壓河岳而封豕  
殘魂未屠劔首長蛇餘喘偷窺外甸烽亭不靜五  
載於斯昔歲蟻壞瘻食樊漢今茲蟲毒浸淫未已  
興師十萬日費千金五歲之費寧可貲計陛下何  
惜匹馬之驛百金之賂數行之詔誘此凶頑使河  
塞息肩關境全命蓄甲養民以觀彼弊我策若行  
則爲不世之福若不從命不過如戰失一隊耳或  
云遣使不受則爲辱命夫以天下爲量者不計細  
耻以四海爲任者寧顧小節一城之沒尚不足惜

一使不反曾何取慙且我以權取貴得我畧行何  
嫌其耻所謂尺蠖之屈以求伸也臣不言遣使必  
得和自有可和之理猶如欲戰不必勝而有可勝  
之機耳謂宜早發大軍廣張兵勢徵犀甲於岷峨  
命樓舡於浦海使自青徂豫候騎星羅沿江入漢  
雲陣萬里據險要以奪其魂斷糧道以折其膽多  
設疑兵使精悉而計亂固列金湯使神茹而慮屈  
然後發衷詔馳輕驛辯辭重幣陳列吉凶北虜頑  
而愛竒貪而好古畏我之威喜我之賂畏威喜賂

願和必矣陛下用臣之啓行臣之計何憂王門之下而無款塞之胡哉彼之言戰旣慙勤臣之言和亦慙闕伏願察兩塗之利害檢二事之多少聖照玄省灼然可斷

上北伐圖疏

王融

臣聞情愔自中事符則感象構於始機動斯彰莊敬之道可宗會揖讓其彌肅勇烈之士足貴應輦鐸以增思肇植生民厥詳降反興運維道有徵莫不有因循而升皇業者也若夫膏腴旣稱天乙知

五方之富皮幣已列帝劉則四海之尊異封禪之文則升中之典攸邇嘆輿地之圖乃席倦之庸是立伏惟陛下窮神盡聖揔極居中偶化兩儀均明二耀拯玄綱於頽絕反至道於澆淳可謂區寓儀刑齊民先覺者也臣亦遭逢生此嘉運鑿飲耕食自幸唐年而識用昏霾經術踈淺將適且軸豈歛與徵皇鑒燭幽天高聽下賞片言之或善矜一物之失時湔拂塵蒙霑飾光價拔足草廬廁身朝序復得拜賀歲時瞻望日月於臣心願魯已畢矣但

廣廣之遺  
千祀一逢休明難再思策鈔駕樂陳消盞竊習戰  
陣攻守之術農桑牧藝之書申商韓墨之權伊傅  
周孔之道常願待詔朱闕俯對青蒲請閑宴之私  
談當世之務位賤人微徒深傾欵方今九服清怡  
三靈和晏未有附枝輪無異轍東鞮獻舞南辯傳  
歌羗燹踰山秦屠越海舌象翫委體之懃輶譯厭  
瞻巡之數固將開桂林於鳳山餞金城於西守而  
蠢爾獯狄敢讐大邦假息關河竊命函谷淪故京  
之爽塏變舊邑而荒涼息反坫之儒衣又伊川之

被髮北地殘氓東道遺老莫不茹泣吞悲傾耳戴  
日翹心仁政延首王風若試馳咫尺之書具甄戎  
旅之卒徇其墮城納其降虜可弗勞弦鏃無待干  
戈真皇王之兵征而不戰者也臣乞以執爰先邁  
式道中原澄澣渚之恒流掃狼山之積霧係單于  
之頸屈左賢之膝習呼韓之舊儀拜鑾輿之巡幸  
然後天移雲動勒封岱宗咸五登三追蹤七十百  
神肅警萬國具僚璿弁星離玉帛雲聚集三燭於  
蘭席聆萬歲之禎聲豈不盛哉豈不躋哉昔桓公

志在伐莒郭牙審其幽趣魏后心存去漢德祖究其深言臣愚昧付誠不足以知微然伏揆聖心規模弘遠既圖載其事必克就其功臣不勝歡喜

請置學宮疏

邢邵

世室明堂顯於周夏一黷兩學盛自虞殷所以宗配上帝以著莫大之嚴宣布下土以彰則大之軌養黃髮以詢哲言育青衿而敷教典用能享國長乂風徽萬祀者也爰暨亡秦改革其道坑儒滅學以蔽黔黎故九服分崩祚終二代炎漢勃興更脩

儒術故西京有六學之義東都有三本之盛逮自魏晉撥亂相因兵革之中學校不絕仰惟高祖孝文皇帝稟聖自天道鏡古今列校序於鄉黨敦詩書於郡國但經始事殷戎軒屢駕未遑多就弓劍弗追世宗統歷聿遵先緒永平之中大興板築續以水旱戎馬生郊雖逮為山還傳一簣而明堂禮樂之本乃鬱荆棘之林膠序德義之基空盈牧豎之跡城隍嚴固之重闕墉石之功墉構顯望之要少樓榭之飾加以風雨稍侵漸致虧墜非所謂追

廣曆文選 卷之十一 三十九  
隆堂構儀刑萬國者也伏聞朝議以高祖大造區  
夏道侔姬文擬祀明堂式配上帝今若基址不脩  
仍同丘畎即使高皇神享闕於國陽宗事之典有  
聲無實此臣子所以匪寧億兆所以佇望也臣又  
聞官方授能所以任事事既任矣酬之以祿如此  
則上無曠官之譏下絕尸素之謗今國子雖有學  
宮之名無教授之實何異兔絲鷦交南箕北斗哉  
昔劉向有言王者宜興辟雍陳禮樂以風天下夫  
禮樂所以養人刑法所以殺人而有司勤勤請定

刑法至於禮樂則曰未敢是敢於殺人不敢於養  
人也臣以爲當今四海清平九服寧宴經國要重  
理應先營脫復稽延則劉向之言徵矣但事不兩  
興須有進退以臣心愚量宜罷尚方彫靡之作頗  
省永寧土木之功并減瑤光材瓦之力兼分石窟  
鑄琢之勞及諸事役非世急者三時農隙脩此數  
條使辟雍之禮蔚爾而復興諷誦之音煥然而更  
作美榭高墉嚴莊於外槐宮棘寺顯麗於中更明  
古今重遵鄉飲敦進郡學精課經業如此則元凱

可得之於上序游夏可致之於下國豈不休歟

諫婚娶喪葬不依古式疏

高允

前朝之世屢發明詔禁諸婚娶不得作樂及葬送之日歌謠鼓舞殺牲燒塋一切禁斷雖條旨久頒而俗不革變將由居上者未能恢改爲下者習以成俗教化陵遲一至於斯昔周文以百里之地脩德布政先於寡妻及於兄弟以至家邦三分天下而有其二明爲政者先自近始詩云爾之教矣民胥効矣人君舉動不可不慎禮云嫁女之家三日

不息燭娶婦之家三日不樂今諸王納室皆樂部給伎以爲嬉戲而獨禁細民不得作樂此一異也古之婚者皆揀擇德義之門妙選貞閑之女先之以媒娉繼之以禮物集寮友以重其別親御輪以崇其敬婚姻之際如此之難今諸王十五便賜妻別居然所配者或長少差舛或罪入掖庭而作合宗王妃嬪藩懿失禮之甚無復此過往年及今頗有檢劾誠是諸王過酒致責跡其元起亦由色衰相棄致此紛紜今皇子娶妻多出宮掖今天下小



民必依禮限此二異也萬物之生靡不有死古先  
哲王作為禮制所以養生送死折諸人情若毀生  
以奉死則聖人所禁也然葬者藏也死者不可再  
見故深藏之昔堯葬穀林農不易畝舜葬蒼梧市  
不改肆秦始皇作為地市下錮三泉金玉寶貨不  
可計數死不旋踵尸焚墓掘由此推之堯舜之儉  
始皇之奢是非可見今國家營葬費捐巨億一旦  
焚之以為灰燼苟靡費有益於亡者古之臣奚獨  
不然今上為之不輟而禁下民之必止此三異也

古者祭必立尸序其昭穆使亡者有憑致食饗之  
禮今已葬之魂人直求貌類者事之如父母燕好  
如夫妻損敗風化瀆亂情禮莫此之甚上未禁之  
下不改絕此四異也夫饗者所以定禮制訓萬國  
故聖王重之至乃爵盈而不飲肴乾而不食樂非  
雅聲則不奏物非正色則不列今之大會內外相  
混酒醉喧詭罔有儀式又俳優鄙藝污辱視聽朝  
廷積習以為美而責風俗之清純此五異也今陛  
下當百王之末踵晉亂之弊而不矯然釐改以厲

頽俗臣恐天下蒼生永不聞見禮教矣

興學疏

馮懷

臣聞先王之教也崇典訓明禮學以示後生道萬物之性暢為善之道也宗周既興文史載煥端委治於南蠻頌聲逸於四海故延州入聘聞雅音而嗟咨韓起適魯觀易象而歎息何者立人之道於此為首也孔子恂恂道化沫泗孟軻皇皇誨誘無倦是以仁義之聲于今猶存禮讓之風千載未泯疇昔陵替喪亂屢臻儒林之教斲頽庠序之禮有

闕國學索然墻卷莫啓有心之徒抱志無由昔魏武身親介冑務在武功猶尚息鞍披覽投戈吟詠以為世之所須者治之本宜崇况今陛下以聖明臨朝百官以虔恭蒞事朝野無虞江外靜謐如之何泱泱之風漠焉無聞洋洋之美墜於聖世乎古人有言詩書義之府禮樂德之則實宜留心經籍闡明學義使諷頌之音盈於京室味道之賢

豪右占奪疏

李世安

臣聞量地畫野經國大式邑地相參致治之本井

稅之興其來日久田萊之數制之以限蓋欲使土不曠民民罔游力雄擅之家不獨膏腴之美單陋之夫亦有頃畝之分所以恤彼貧微抑茲貪欲同富約之不均一齊民於編戶竊見州郡之民或因年儉流移棄賣田宅漂居異鄉事涉數世三長既立始返舊墟廬井荒毀桑榆改植事已歷遠易生假冒疆宗豪族肆其侵凌遠認魏晉之家近引親舊之驗又年載稍久鄉老所惑群證雖多莫可取據各附親知互有長短兩證徒具聽者猶疑爭訟

遷延連紀不判良疇委而不開柔桑枯而不採僥倖之徒興繁多之獄作欲令家豐歲儲人給資用其可得乎愚謂今雖桑井難復宜更均量審其徑術令分藝有準力業相稱細民獲資生之利豪右靡餘地之盈則無私之澤乃播均於兆庶如阜如山可有積於比戶矣又所爭之田宜限年斷事久難明悉屬今主然後虛妄之民絕望於覬覦守分之士永免於凌奪矣高祖深納之後均田之制起於此矣

水害疏

崔楷

臣聞有國有家者莫不以萬姓為心故矜傷軫於  
 這次求瘼結於寢興黎民阻饑唐堯致難衆庶斯  
 饑帝乙罰已良以為政與農實繫民命水旱緣茲  
 以得濟夷險用此而獲安頃東北數州頻年淫雨  
 長河激浪洪波汨流川陸連濤原隰通望彌漫不  
 已汎濫為災戶無擔石之儲家有藜藿之色華壤  
 膏腴變為烏鹵菽麥禾黍化作藨蒲斯用痛心排  
 徊潛然佇立也昔洪水為害四載流於夏書九土

既平攸同紀自虞誥亮由君之勤恤臣用劬勞日  
 晏忘餐宵分廢寢伏惟皇魏握圖臨宇物惣契裁極  
 道敷九有德被八荒槐階棘路實維英哲虎門鹿  
 閣寔曰賢明天地函和日月光曜自比定冀水潦  
 無歲不饑幽瀛川河頻年汎溢豈是陽九厄會百  
 六鍾期故以人事而然非為運極昔魏國鹹鳥史  
 起哂之茲地荒蕪臣實為取不揆愚瞽輒敢陳之  
 計水之湊下浸潤無閒九河通塞屢有變改不可  
 一準古法皆循舊隄何者河決瓠子梁楚幾危宣

防既建水還舊迹十數年間戶口豐衍又決屯氏  
兩川分流東北數郡之地僅得支存及下通靈鳴  
水田一路往昔膏腴十分病九邑居凋離墻并毀  
滅良由水大渠狹更不開瀉衆流壅塞曲直乘之  
所致也至若量其逶迤穿鑿消澮分立隄竭所在  
䟽通預決其路令無停蹙隨其高下必得地形土  
木參功務從便省使地有金隄之堅水有非常之  
備鈎連相注多置水口從河入海遠邇逕過瀉其  
境瀉泄此陂澤九月農罷量役計功十月昏正立

匠表度縣遣能工麾畫形勢郡發明使籌察可否  
審地推岸辨其脉流樹板分崖練厥從往別使案  
檢分部是非瞰睇川原明審通塞當境脩治不勞  
役遠終春自罷未須又功即以高下營田因於水  
陸水種杭稻陸藝桑麻必使室有久儲門豐餘積  
其實上葉禦災之方亦為中古井田之利即之近  
事有可比倫江淮之南地勢沓下雲雨陰霖動彌  
旬月遙途遠運惟用舟艫南畝畚畜微事耒耜而  
衆庶未為饑色黔首罕有饑顏豈天德不均致地

廣文選 卷之十一  
偏罰故是地勢異圖有茲豐饒臣既鄉居水際日  
覩荒殘每思鄭白屢想王李夙宵不寐言念皇家  
愚誠丹款實希效力有心螢爝乞整施行使數州  
士女無廢耕桑之業聖世洪恩有賑饑荒之士鄴  
宰深笑息自一朝臣之至誠申於今日

封蜀疏

于宣敏

臣聞開盤石之宗漢室於是惟永建維城之固周  
祚所以靈長昔秦皇置牧守而罷諸侯魏后暱諂  
邪而踈骨肉遂使宗社移於佗族神器傳於異姓

此事之明甚於觀火然山川設險非親勿居且蜀  
土沃饒人物殷阜西通邛夔南屬荆巫周德之衰茲  
土遂成戎首炎政失御此物便為禍先是以明者  
防於無形治者制其未亂方可慶隆萬世年逾七  
百伏惟陛下日角龍顏膺樂推之運參天貳地居  
揖讓之期億兆宅心百神受職理須樹建藩屏封  
植子孫繼周漢之宏圖改秦魏之覆軌抑近習之  
權勢崇公族之本枝但三蜀三齊古稱天險分王  
戚屬今正其時若使利建合宜封樹得所巨猾息

其非望姦臣杜其邪謀盛業洪基同天地之長久  
英聲茂實齊日月之照臨臣雖學謝多聞然情深  
體國輒申管見戰灼惟深

訪讜言上疏

王椿

伏奉詔書以風電厲威上動天睠訪讜辭於百辟  
詔輿誦於四海宸衷懇切備在絲綸祇承競感心  
焉靡厝伏惟陛下啓錄應期馭育萬物承綴旒之  
艱運纂織絲之危緒忘餐日昃求衣未明俾上帝  
下臨愍茲荼蓼未濟溝壑而滄浪降戾作害中秋

上帝照臨義不虛變竊惟風爲號令皇天所以示  
威電者氣激陰陽有所交諍殆行令殊節舒急失  
中之所致也昔澍雨千里寔緣教祀之誠炎精三  
舍寧非善言之力譴不空發徵豈謬應誰謂蓋高  
實符人事伏願陛下留心曲覽垂神遠察禮賢登  
士博舉審官擢申滯怨振窮省役使夫滋水沒川  
之彥畢居朝右儀表丹青之位未或虛加園土絕  
五毒之民揆日息千門之費巖巖廊署無不遇之  
士忪忪惇獨荷酒帛之恩則物見昭蘇人知休泰

廣文選 卷之十一  
徐奏薰風之曲無論鴻鴈之歌豈不天人幸甚鬼神咸抃

論嫡庶疏

顧譚

是時魯王霸有盛寵與太子和齊衡譚上疏曰臣聞有國有家者必明嫡庶之端異尊卑之禮使高下有差階級踰邈如此則骨肉之恩生覬覦之望絕昔賈誼陳治安之計論諸侯之勢以為勢重雖親必有逆節之累勢輕雖疎必有保全之祚故淮南親弟不終饗國失之於勢重也吳芮疎臣傳祚

長沙得之於勢輕也昔漢文帝使慎夫人與皇后同席袁盎退夫人之座帝有怒色及盎辨上下之儀陳人璉之戒帝既悅悻夫人亦悟今臣所陳非有所偏誠欲以安太子而便魯王也由是霸與譚有隙

陳政事伍條

周樂遜

其一崇治方曰竊惟今之在官者多求清身克濟不至惠民愛物何者比來守令年期既促歲貴有成蓋謂猛濟為賢未甚優養此政既代後者復然



夫政之民過急則刻薄傷緩則弛慢是以周失舒  
緩秦敗急酷民非赤子當以赤子遇之宜在舒疾  
得衷不使勞擾頃承魏之衰政人習逋違先王朝  
憲備行民咸識法但可宣風正俗納民軌訓而已  
自非軍旅之中何用過爲迫切至於興邦致治事  
由德教漸以成之非在倉卒竊謂姬周盛德治興  
文武政穆成康自斯厥後不能無事昔申侯將奔  
楚子誨之曰無適小國言以政狹法峻將不汝容  
敬仲入齊稱曰幸若獲宥及於寬政然關東諸州

淪陷日久人在塗炭當慕息肩若不布政優優聞諸  
境外將何以使彼勞民歸就樂土其二省造作曰頃  
者魏都洛陽一時殷盛貴勢之家各營第宅車服器  
玩皆尚奢靡世逐浮競人習澆薄終使禍亂交興天  
下喪敗比來朝貢器服稍華百工造作務盡奇巧  
臣誠恐物逐好移有損政俗如此等事頗宜禁省  
記言無作淫巧以蕩上心傳稱宮室崇侈民力彫  
弊漢景有云黃金珠玉饑不可食寒不可衣彫文  
刻鏤傷農事者也錦繡纂組害女功者也以二者

唐虞文選 卷之十一  
爲饑寒之本源矣然國家非爲軍戎器用時事要  
須而造者皆徒費功工損國害民未如廣勸農桑  
以衣食爲務使國儲豐積大功易舉其三明選舉  
曰選曹賞錄勲賢補擬官爵必宜與衆共之有明  
揚之授使人得盡心如覩白日其材有升降其功  
有厚薄祿秩所加無容不審即如州郡選置猶集  
鄉閭况天下選曹不取物字州郡自可內除此外  
付曹銓者旣非機事何足可密人生處世以榮祿  
爲重脩身履行以纂身爲名然逢時旣難失時爲

易其選置之日宜令衆心明白然後呈奏使功勤  
見知品物稱悅其四重戰伐曰魏作告終天曠在  
德而高洋稱僭先迷未敗擁逼山東事切肘腋譬  
猶棊刼相持爭行先後若一行非當或成被利誠  
應捨小營大先保封域不宜貪利在邊輕爲興動  
捷則勞兵分守敗則所損已多國家雖疆洋不受  
弱詩云德則不競何憚於病唯德可以庇民非恃  
疆也夫力均勢敵則進德者勝君子道長則小人  
道消故昔之善戰者先爲不可勝以待敵之可勝

彼行暴戾我則寬仁彼為刻薄我必惠化使德澤  
 滂流人思有道然後觀釁而作可以集事其五禁  
 奢侈曰按禮人有貴賤物有等差使用之有節品  
 類之有度馬后為天下母而身服大練所以率下  
 也季孫相三君矣家無衣帛之妾所以勵俗也此  
 來富室之家為意稍廣無不資裝婢隸作車後容  
 儀服飾華美眩曜街衢仍使行者輟足路人傾蓋  
 論其輸力公家未若介冑之士然其坐受優賞自  
 喻攻戰之人縱令不惜功費豈不有虧厥德必有

儲蓄之餘孰與務恤軍士魯莊公有云衣食所安  
 不敢愛也必以分人詩言豈曰無依與子同袍皆  
 所以取人力也又陳事上議之徒亦應不少當有  
 上徹天聽者未聞是非陛下雖念存物議欲盡天  
 下之情而天下之情猶為未盡何者取人受言貴  
 在顯用若納而不顯是而不用則言之者或寡矣

永興二年上疏 魏書十二

張袞

臣既庸人志無殊操值太祖誕膺期運天地始開  
 參戎氛霧之初馳驅革命之會託翼鄧林寄鱗溟

廣廣文選 卷之十一  
海遂荷恩寵榮兼出內陛下龍飛九五仍參顧問  
曾無微誠塵山露海今舊疾彌留氣力虛頓天罰  
有罪將填溝壑然大馬戀主敢不盡言方今中夏  
雖平九域未一西有不賓之羌南有逆命之虜岷  
蜀殊風遼海異教雖天挺明聖撥亂乘時而因幾  
撫會寔須經略介焉易失功在人謀伏願恢崇叡  
道克廣德心使揖讓與干戈竝陳文德與武功俱  
運則太平之化康哉之美復隆於今不獨前代昔  
子囊將終寄言城郢荀偃辭哈遺恨在齊臣雖閭  
劣敢忘前志魂而有靈結草泉壤

上世宗疏

邢巒

臣聞昔者明王之以德治天下莫不重粟帛輕金  
寶然粟帛乃安國育民之方金玉是虛華損德之  
物故先皇深觀古今去諸奢侈服御尚質不貴雕  
鏤所珍在素不務奇綺至乃以紙絹為帳裯銅鐵  
為轡勒訓朝廷以節儉示百姓以憂務日夜孜孜  
小大必慎輕賤珠璣示其無設府藏之金裁給而  
已更不買積以費國資逮景明之初承升平之業

廣周文選 卷之十一  
四疆清晏遠邇來同於是蕃貢繼路商賈交入諸  
所獻賀倍多於常雖加以節約猶歲損萬計珍貨  
常有餘國用恒不足若不裁其分限便恐無以支  
歲自今非爲要須者請皆不受

上廢帝疏

羊深

臣聞崇禮建學列代之所脩尊經重道百王所不  
易是以均塾洞啓昭明之頌載揚膠序大闢都穆  
之詠斯顯伏惟大魏乘乾統物欽若奉時模唐軌  
虞率由前訓重以高祖繼聖垂衣儒風載蔚得才

之盛如彼薪樞固以追隆周而竝驅駕炎漢而獨  
邁宣皇下武式遵舊章用能揄揚盛烈聿脩厥美  
自茲已降世極道消風猷稍遠澆薄方競退讓寂  
寥馳競靡節進必吏能升非學藝是使刀筆小用  
計日而期榮專經大才甘心於陋巷然治之爲本  
所貴得賢苟值其人豈拘常檢三代兩漢異世間  
出或釋褐中林鬱登卿尹或投竿釣渚徑升公相  
事炳丹青義在往策遐哉邈乎不可勝紀竊以今  
之所用弗脩前矩至如當世通儒冠時盛德見徵

廣文通 卷之十一 四  
不過四門登庸不越九品以此取士求之濟治譬  
猶却行以及前之燕而向楚積習之不可者其所  
由來漸矣昔魯興泮宮頌聲爰發鄭廢學校國風  
以譏將以納民軌物莫始於經禮菁莪育才義光  
於篇什自兵亂以來垂將十載干戈日陳俎豆斯  
闕四海荒涼民物凋敝名教頓虧風流殆盡世之  
陵夷可爲歎息陛下中興纂曆理運惟新方隅稍  
康實惟文德但禮賢崇讓之科俗世未備還淳反  
樸之化起言斯繆夫先黃老而退六經史遷終其

成蠹貴玄虛而賤儒術應氏所以亢言臣雖不敏  
敢忘前載且魏武在戎尚脩學校宣尼確論造次  
必儒臣愚以爲宜重脩國學廣延胄子使函丈之  
教日聞釋奠之禮不闕并詔天下郡國興立儒教  
考課之程咸依舊典苟經明行脩宜擢以不次仰  
斗筭喋喋之才進大雅汪汪之德博收鴻生以光  
顧問繫維竒異共精得失使區寰之內競務仁義  
之風荒散之餘漸知禮樂之用豈不美哉臣誠闇  
短敢慕前訓用稽古義上塵聽覽伏願陛下垂就

日之監齊非煙之化儻以臣言可採乞特施行

請校東觀典籍疏

孫惠蔚

臣聞聖皇之御世也必幽贊人經參天貳地憲章典故述遵鴻猷故易曰觀乎天文以察時變觀乎人文以化成天下然則六經百氏圖書祕籍乃承天之正術治人之貞範是以溫柔疏遠詩書之教恭儉易良禮樂之道爰示以精微為神春炁以屬詞為化故大訓炳於東序藝文光于麟閣斯寔太平之樞宗勝殘之要道有國之靈基帝王之盛業

安上靖民敦風美俗其在茲乎及秦棄學術禮經泯絕漢興求訪典文載舉先王遺訓粲然復存暨光武撥亂日不暇給而入洛之書二千餘兩魏晉之世尤重典墳收亡集逸九流咸備觀其鳩閱史篇訪購經論紙竹所在路盡無遺臣學闕通儒思不及遠徒循章句片義無立而慈造曲覃厠班秘省忝官承乏唯書是司而觀閣舊典先無定目新故襍糅首尾不全有者累帙數十無者曠年不寫或篇第褫落始末淪殘或文壞字誤謬爛相屬篇

目雖多全定者少臣今依前丞臣盧景所撰甲乙  
新錄欲裨殘補闕損併有無校練句讀以為定本  
次第均寫永為常式其省先無本者廣加推尋搜  
求令足然經紀浩博諸子紛綸部帙既多章篇紕  
繆當非一二校書歲月可了今求令四門博士及  
在京儒生四十人在秘書省專精教考參定字義  
如蒙聽許則典文允正群書大集


請進見疏

蔡義

臣山東草萊之人行能亡所比容貌不及衆然而  
不棄人倫者竊以聞道於先師自託於經術也願  
賜清閒之燕得盡精思於前



廣廣文選  
四卷之十一  
四七



廣廣文選卷之十一

